



老子特解

下

口仁13  
1077  
2止





門 〇 13  
第 卷

子 文 庫



老子

門人谷大和宮田明續撰

道常無名章第三十二 九六十九字

道常無名。樸雖小，天下不敢臣。侯王若能守，萬物將自賓。天地相合，以降甘露。民莫之令，而自均。始制有名，名亦既有，夫亦將知止。知止所以不殆，譬道之在天下，猶川谷之於江海。

名讀如命，字夫音符。梁武侯王作王侯。

道不變而無為，故無名之也。物雖小，守其樸而不散，則不為人所器使。故曰：天下不敢臣，所謂璞玉渾金，人皆以為寶，莫知名其器也。侯王能守其樸，

老子 寺 屏

一 亦 七

觀 水 室



而無爲則道常爲主於內而不爲物所誘。物爲賓於外。故曰萬物將自賓也。天地之道無爲也。相合者。天氣下降。地氣上騰。則能降雨露。其霑物之德無窮。故曰甘露正。如詩云靈雨不必祥瑞也。莫令諸民而自均平也。即以雨露之霑物。莫不均齊。喻聖人無爲之化。潤澤天下。亦如是矣。始制有名。謂制樸爲器也。上章云樸散則爲器。業已爲器。則有名。有名則大小長短各有其分。則當知其所止也。止如止於至善之止。言官各有職。物各有分。則守其職分而不願於外也。莊子所謂庖人雖不治庖

尸。祝不越樽俎而代之矣。若然者。身不危殆也。莊子逍遙遊篇內。鵬鷃大小自得之喻。皆知止之謂也。以無爲之道。化天下猶川谷於江海。江海不求於川谷。而川谷自歸於江海。下章云道常無爲而無不爲。言以無爲故能爲。即不治之治也。此章言道不變而無爲。故不可名。物雖小。守樸不離。則不爲天下所器使。王侯能守此道。則不爲物所誘。而無惑溺之患。可以脩身而全性。可以治邦家矣。是乃無爲之化。譬如天地和合。降雨露。莫令而自均也。制既有名。亦知其所止。而守分則不危殆其身。



也。

知人者智章第三十三 凡三十八字

知人者智。自知者明。勝人者有力。自勝者強。知足者富。強行者有志。不失其所者久。死而不亡者壽。下強其丈

反

知人而能用之。智者之事也。書云。知人則哲。能官人。聖人猶難之。老子則以為不若自知者明。自知者言。自知己分。不以有涯隨無涯。以知傷生也。知己而。不殉物。故曰明。上章云。貴以身為天下者。愛以身為天下者。皆謂完身全性也。所謂道之真以

治身其緒餘。以為國家。其土苴以治天下。莊子養生主讓王等篇。專言此意。即內聖外王。老莊之所主也。以力勝人者。人多於己。則不得勝之。自勝者。無物以損之。故曰強也。知足者。知己分而無願於外。則無不足。無不足。則身雖貧。心乃富也。莊子所謂鷦鷯巢於深林。不過一枝。偃鼠飲河。不過滿腹。是也。強行者。勉強而行之也。若然者。有所志而不失也。不失其所者。即不失其所志也。若然者。必能久長矣。久長則必得其道也。死而不亡者。能得其道。則身雖死。道存業立。猶生之日。所謂不朽。故曰



壽也。此章言自知自勝知足不失其所則得長久而不亡也。

大道汜兮章第三十四 凡六十二字

大道汜兮。其可左右萬物恃之以生而不辭。功成不名有愛養萬物而不為主。常無欲可名於小萬物歸焉而不為主。可名為大。是以聖人終不為大。故能成其大。汜又作汎

汜與汎同濫也。言大道無為汜濫若水之無所係屬。故可左之亦可右之。唯其所欲能者得之。孟子所謂左右逢其原。與此同意。恃如無母何恃之恃。

賴也。之者指天地無為之化也。言萬物恃之而生。各成大小長短之性。天地無為故不敢辭也。成物而不居其功。是不有其名也。不為主者。雖愛養萬物不為其主。任物自然也。無為故無欲可名於小者。即守雌守辱也。雖為萬物所歸而不為其主。而居其功。豈可不名為大乎。聖人行無為之道。故不為大而能成其大也。此章與第二章相發。

執大象章第三十五 凡四十三字

執大象。天下徃徃而不害。安平泰。樂與餌。過客止。道之出口。淡乎其無味。視之不足見。聽之不足聞。用之



不可既往於放反樂音岳餌而志反過古木反出尺類反

大象大道之象也。下章云大象無形。往嚮往也。史記孔子世家贊云心嚮往之與此同意。不害任其素而不治之也。言執無為之象以化之則天下嚮往歸心既已歸心而不攪擾之則天下安平泰也。樂八音也。餌美食也。既盡也。言樂娛人耳。餌悅人口所以止留過客也。然樂闕餌盡則人不止留也。道之為言淡然而無味。視之不足以悅目。聽之不足以娛耳。若無所用。然施之天下其化不可窮盡也。此章言無為之化。天下所嚮往既歸而莫害之則

安平泰也。其道淡漠不足見聞。然用之無盡也。

將欲歛之章第三十六 凡五十七字

將欲歛之必固張之。將欲弱之必固強之。將欲廢之必固興之。將欲奪之必固與之。是謂微明。柔勝剛弱。勝強。魚不可脫於淵。國之利器不可以示人。歛許及反

給河上作翕

歛歛氣也。歛氣者縮鼻也。欲歛故張之。固如固辭之。固皆反而為之。韓非以越王宦於吳而勸之伐齊。喻欲歛而張之。欲弱而強之之意。以晉獻公將襲虞。遺之璧馬。知伯將襲仇由。遺之廣車。喻欲奪



而與之之意得之微。即微妙玄通之微。深不可識也。下章云。明道若昧。是也。老子主意在聖人欲天下治。故不治之。是以無為而不為。即柔勝剛弱。勝強是也。淵者魚所止也。脫之不得為魚也。無為久主之淵也。人主而有為。猶魚脫淵也。王弼曰。利器。利國之器也。莊子云。聖人天下之利器也。而人主尚賢貴智。則下競賢智。而撓人心。是示利器於人。故也。上章不尚賢。使民不爭。絕聖棄智。民利百倍。皆是意也。此章言聖人欲治。故不治之。皆反而為之。下章所謂反者。道之動。此之謂也。莊子胠篋

在宥等篇多言此指。

道常無為章第三十七

凡四十八字

道常無為。而無不為。侯王若能守。萬物將自化。化而欲作。吾將鎮之以無名之樸。無名之樸。亦將不欲。不欲以靜。天下將自定。

道常無為。故無不為。侯王能守此道。則萬物將自然化之。作。將有為也。言既歸化。吾而將有為。則吾將以無名之樸。鎮壓而不為主也。無名之樸。亦吾將不欲之。若欲之。則亦非樸。唯其不欲而安靜。則天下將自然定。即上章所謂常無欲。以觀其妙之



意。此章言聖人以無為化下任自然而不為主也。

上德不德章第三十八 凡百三十一字

上德不德是以有德。下德不失德是以無德。上德無為而無不為。下德為之而無以為。上仁為之而無以為。上義為之而有以為。上禮為之而莫之應。則攘臂而仍之。故失道而後德。失德而後仁。失仁而後義。失義而後禮。夫禮者忠信之薄而亂之首也。前識者道之華而愚之始也。是以大丈夫處其厚不處其薄。處實而不處其華。故去彼取此。

夫音符處呂呂反去羞呂反

攘若羊反臂必寐反仍如燕反一作扔人證反

上德不德者。上所謂虛其心。言無所營求也。韓非云。言其神不淫於外也。神不淫於外則身全身全之謂德。是以有德者所謂實其腹。言德充塞於內也。下德不失德。是以無德者。言欲不失德而有所營求。故德不全也。上德無為而無不為者。言以無為故無不為也。莊子所謂出為無為則為出於無為矣。是也。下德為之而無以為者。言以為之故無以為也。上仁為之而無以為者。言以愛人利物故其化未遍也。上義為之而有以為者。言理財正辭禁民為非。而有不從者。則強而令之使從也。上禮



為之而莫之應則攘臂而仍之者仍就也言以禮率下而不之應猶為禮導之也形容為禮之貌也德曰上下仁義禮不曰下者上尚如是下不足道也老聃謂至道之世民不知德後聖以仁義為毀道以禮為偽為亂故曰失道而後德失德而後仁失仁而後義失義而後禮夫禮者忠信之薄而亂之首也王弼曰前識者前人而識也竭其聰明以為前識役其智力以營庶事姦巧彌密愈喪篤實而事昏務而治歲雖竭聖知而民愈害故曰道之華而愚之始也是以大丈夫處其厚不處其薄處

其實不處其虛故去彼取此者言知道者能守無為之道而不營末事也此章言非無為則不可為也莊子知北游篇推明此章之旨

昔之得一章第三十九 凡百三十八字

昔之得一者天得一以清地得一以寧神得一以靈谷得一以盈萬物得一以生侯王得一以為天下貞其致之一也天無以清將恐裂地無以寧將恐發神無以靈將恐歇谷無以盈將恐竭萬物無以生將恐滅侯王無以貞而貴高將恐蹙故貴以賤為本高以下為基是以侯王自謂孤寡不穀此其以賤為本耶



非乎。故致數車無車。不欲碌碌如玉，落落如石。貞一作正

裂力竭反，歇許謁反，蹶蹇月反，又其月反，數色主反，碌音祿。

昔者謂物之始也。一者純一不易之道，謂無為也。言天之所以清，地之所以寧，神之所以靈，谷之所以盈，萬物之所以生，侯王之所以為天下，貞皆以無為也。故曰其致之一也。天非無為而無以清明，則將裂破地，非無為而無以寧靜，則將發動，神非無為而無以虛靈，則將歇盡，谷非無為而無以納汙盈滿，則將竭涸，萬物非無為而無以生育，則將滅絕，侯王非無為而無以貞正，而貴高，則將蹙顛。

故賤者貴之本，下者高之基。是以侯王以孤寡不穀為自稱者，以賤為本故也。非乎者，言不非也。車總名也。歷數輪輻蓋軫衡軛轂轄，則無所謂車者也。侯王統邦統天下之名也。下有百官庶尹而供其職，君統其治，蓋以輪輻不具，不得為車，譬喻無百官庶尹，不得為王侯，以明賤下為本基也。如負其才智，親有司所掌，則所謂叢脞而庶事墮焉。故為人君，不驕富貴，卑身恭己，可以無為治天下國家也。不欲如玉石，碌碌落落，明白堅硬，有名小物也。此章言非無為不可以為治也。莊子曰：天無為。



以之清。即謂此肯。

反者道之動章第四十 凡二十一字

反者道之動。弱者道之用。天下萬物生於有。有生於

無。

有者無之反。無者有之反。動者謂活動而有為也。用者謂由用而通行也。蓋無為則無不為。有為則無以為。我欲有為故無為。我欲剛強故守柔弱。是道之所動。道之所行也。言皆反而為之也。有無首章所謂天地之始。萬物之母。有生於無。謂其所以反也。此章說無為之為。辭義自明。

上士聞道章第四十一 凡九十八字

上士聞道勤而行之。中士聞道若存若亡。下士聞道而大笑之。不笑不足以為道。故建言者有之。曰明道若昧。進道若退。夷道若類。上德若谷。大白若辱。廣德若不足。建德若偷。質真若渝。大方無隅。大器晚成。大音希聲。大象無形。道隱無名。夫唯道善貸且成。

類雷對反 夫音符

聞道而勤者有志而信之。修諸其身也。若存若亡者志薄而信不厚也。大笑之者不知而非之也。蓋道非下士所知。故笑之。其易知者不足以為道也。



建言即立言也。明道若昧者，中庸所謂闇然而日章也。進道若退者，易所謂不疾而速，不行而至也。言無為則無不為，進道之功。若退而疾也。夷道如類者，坦途雖夷，不無小卑高，不必如砥。猶絲有類也。類，絲節也。上德若谷者，不自滿盈而能虛受物也。大白若辱者，守辱而不自明也。廣德若不足者，有德而不自德，所以為廣也。建德若偷者，建德由己，不欲人之知，猶偷盜避人而潛行也。質真若渝者，不顯其真，故若渝變也。大方無隅者，有方而不見廉隅也。大器晚成者，器大者不可速成，必俟久而成也。大音希聲者，大風疾雷，所不常有也。希罕也。大象無形者，象大而不可形也。道隱無名者，大道之象不可形容，則不可得而名也。夫唯道善貸且成者，雖道隱無名，有能信之者，貸而給之，篤信不倦，則不帝貸之而已。且成其德也。此章言信道者少，故道不行，若有信之者，則不難得也。

道生一章第四十二 凡七十四字

道生一，一生二，二生三，三生萬物。萬物負陰而抱陽，沖氣以為和。人之所惡，唯孤寡不穀，而王侯以自稱也。故物或損之而益，或益之而損。人之所教，我亦教



之強梁者不得其死吾將以為教父惡鳥路反  
 一。太極也。二。兩儀也。三。三才也。三才既立而生萬物。萬物皆向南負陰而抱陽以冲虛之氣為和也。王侯以孤寡不穀人之所惡自稱者以賤為本故也。自卑故下貴之也。此豈非損之而益益之而損乎。易所謂謙卑而不可踰是也。損益盈虛之理如此。人之所教我亦教之。非強為異。但強梁者不得全其性而死。故吾將以守柔處卑之言為教誨之父。此章言欲貴而處卑欲益而損之理也。強梁者不得其死。見周廟金人銘。蓋老子引之歟。

天下之至柔章第四十三 凡四十二字

天下之至柔。馳騁天下之至堅。出於無有入於無間。吾是以知無為之有益。不言之教。無為之益。天下希及之。騁 敷 領 反

此亦兼上謂柔制剛堅也。馳騁猶縱橫也。言柔之至可以縱橫至堅之間。譬如水之穿石也。無有無象也。無間無間隙也。出於無有入於無間。即馳騁天下之至堅也。是乃無為之有益也。不言無為皆至柔也。然知道而行者天下希少。是老聃感慨之言。



名與身章第四十四

凡三十七字

名與身孰親。身與貨孰多。得與亡孰病。甚愛必大費。多藏必厚亡。知足不辱。知止不殆。可以長久。費芳貴反藏才

浪反

名與身孰親者。設問而言。名可踈。身可親也。世人好名。竭其智力。而不能全性命。是忘親其身也。身與貨孰多者。言身一箇也。貨無限也。以一箇身貪貨。而無厭。是不知其量也。得與亡孰病者。言得名利。與亡其身孰病。乃與其得名利。寧不亡身。是故愛畜之甚。不施恩惠。必有大費。所謂貨悖而入者。

亦悖而出也。多藏者。人所覬覦。衆怨自聚。所以必厚亡也。職不知足之由。唯知足而無所營求。則不辱身。知其所止而止。則不殆。身可以全。性命可以長久也。即前章金玉滿堂。莫之能守。與此同意。

大成若缺章第四十五

凡四十字

大成若缺。其用不敝。大盈若沖。其用不窮。大直若詘。大巧若拙。大辯若訥。躁勝寒。靜勝熱。清靜為天下正。缺窺悅反。敝婢世反。或作弊。詘音屈。訥奴忽反。躁早報反。

大成若缺者。與人推及。不獨自成。故若缺。而其所用不敝也。敝壞也。雖則若缺。其用不敝。所以為大。



成也。大盈若冲者，盈者必虧。大盈而處冲虛，故不虧。謙之至也。第四章云：道冲而用之，或不盈，即與此同。蓋盈而若虛者，不滿溢也。不溢則用之不窮。不窮所以為大盈也。大直若詘者，不獨直己與人相直。雖若枉曲，其直廣大，所以為大直也。大巧若拙者，隨物成器，不獨專巧。故若拙而其巧大也。大辯若訥者，不言而行，無所不辯。故雖遲鈍於言，而其所辯不小也。躁勝寒，靜勝熱者，言動而躁者勝，邪寒而不凍，止而靜者勝，暑熱而不暍。躁者犯物之性，靜者全物之真。由是觀之，清靜為天下正也。

此章設五大譬喻，終說清靜無為之道，可以正治天下也。

天下有道章第四十六 凡四十四字

天下有道，卻走馬以糞。天下無道，戎馬生於郊。罪莫大於可欲，禍莫大於不知足，咎莫大於欲得。故知足之足，常足。糞，弗問反。

天下有道，兵車不興，政治務本。走馬非所尚，故用諸農事也。卻者，除去也。糞者，糞田也。言凡馬之所以大用者，外供戎事而內供淫奢也。今有道之世，戎事少而淫奢禁，不事善馬也。天下無道，則反于



此兵數起而產育之故曰戎馬生於郊也郊者謂其近也戎馬乏則用所厩畜也其罪禍咎由貪欲不知足起故無為之化行人知吾分之足而不求於外則無此患也知吾分之足則無不足也莊子逍遙遊篇主言此意

不出戶章第四十七 凡四十字

不出戶可以知天下不窺牖可以見天道其出彌遠其知彌少是以聖人不行而知不見而名不為而成

窺起規反  
牖音酉

可以知天下者知治天下之道也知其道者雖不

出戶而處室中能知治天下也天道有故能知其故者雖不窺牖其見天甚明見猶知也孟子所謂苟求其故千歲日至可坐而致是也不通其道者雖出而求之出彌遠知彌少古昔聖人能通斯道故雖不行能知之雖不見能名之雖不為能成之蓋老子之意重在末一句所謂無為而無不為矣此章言務智彌遠唯由其道無為可以為治也莊子天地篇述此旨

為學者日益章第四十八 凡四十五字

為學者日益為道者日損損之又損以至於無為無



為則無不為。故取天下常以無事。及其有事。又不足以取天下矣。

為世俗之學者。日益其才智。而離樸亂德。使人生爭。為無為之道。日損者。上所謂絕聖棄知。絕仁棄義。是也。以至無為。則無不為矣。取者。取而治之也。有事者。事賢智也。言唯無事。可以取天下。以賢智爭之者。不足以取天下也。此章亦說賢智不可以治天下也。莊子在宥篇專言此意。

聖人無常心章第四十九 凡六十四字

聖人無常心。以百姓心為心。善者吾善之。不善者吾

亦善之。德善信者吾信之。不信者吾亦信之。德信聖

人在天下。歛歛為天下。渾其心。百姓皆注其耳目。聖

人皆孩之。歛許又反。渾古本反。為干偽反。注之。樹反。孩古來反。

常定也。聖人無所常定之心。以百姓之心為吾心。而莫分善不善。皆善之故。吾德善矣。莫分信不信。皆信之故。吾德信矣。吾聖人也。善者信者。善之信之。是固當然也。不善者亦善之者。謂不惡而却也。不信者亦信之者。謂不疑而踈也。聖人之於天下。歛歛焉。危懼不安。為天下渾濁其心。而莫分善不善。信不信。則無棄人。是以百姓注其耳目於吾



而歸之聖人皆以嬰兒遇之猶言如保赤子也歛歛危懼貌孩嬰兒也此章言上古聖人行無為之道如是即前章絕聖知棄仁義渾濁為治之術也漢曹參之治畧行此術莊子所謂削曾史之行鉗揚墨之口攘棄仁義而天下之德始玄同矣亦述此意

出生入死章第五十 凡八十五字

出生入死生之徒十有三死之徒十有三民之生之而動動皆之死地亦十有三夫何故以其生生之厚蓋聞善攝生者陸行不遇兕虎入軍不被甲兵兕無

所投其角虎無所措其爪兵無所容其刃夫何故以其無死地焉有音又夫音符兕徐履反

出地上也入地中也韓非云人始於生而卒於死始之謂出卒之謂死故曰出生入死人之身三百六十節四肢九竅其大具也此必其所相傳之說也四肢與九竅十有三者盡屬於生屬於謂徒故曰生之徒也死亦屬之故曰死之徒也四肢九竅皆資生之具也不全則有虧于生然耽聲色臭味或負強力舉重好鬪以傷其身則資生之具反為速死之具故曰動之死地亦十有三蓋生者



動動而不止則損損而不止則生盡而死也夫何故者詰問也生生見商書盤誥古辭也猶後世曰生活也言人之不能全生者以其貪生過厚反害其性也蓋聞者謂其所聞也古之善攝養生者陸行避兇虎而不遇則猛獸無所施其暴入軍雖不被甲持兵我無害人之心則人亦無所容其刃又發問曰夫何故耶即以其不貪生遠諸害而無死地也此章言世俗厚生而速死善攝生者不益生不近害能全其性也莊子曰大浸稽天而不溺大旱金石流土山焦而不熱亦言此意

道生之章第五十一

道生之德畜之物形之勢成之是以萬物莫不尊道而貴德道之尊德之貴夫莫之命而常自然故道生之德畜之長之育之成之熟之養之覆之生而不有為而不恃長而不宰是謂玄德夫音符畜許六反覆去聲長竹犬反二十五章云有物混成先天地生可以為天下母吾不知其名字之曰道天下母者生萬物之謂也故曰道生之而非天地之德無以畜之故曰德畜之物生則有形之其成就之者因寒暑風雨之變是勢也覆之庇蔭之也道與德之功固大矣故萬



物不可不尊貴之。然道德之所以尊貴者，雖自萬物不以尊貴命之，常自尊貴也。夫指萬物命猶名也。道生之，德畜之，長育之，成之，熟之，養之，覆之，而不知之，不恃之，不宰制之，其德幽遠，不明，民莫得而名之，故曰：是謂玄德。此章言道本虛無，天地自然，無為而無不為矣。行道者所以體也。莊子所謂整萬物而不為義，澤及萬世而不為仁，長上古而不為老，覆戴天地，刻雕象形而不為巧，亦此之謂。

天下有始章第五十二 凡七十三字

天下有始，可以為天下母。既知其母，復知其子，既知

其子，復守其母，沒身不死。塞其兌，閉其門，終身不勤，開其兌，濟其事，終身不救。見小曰明，守柔曰強，用其光，復歸其明，無遺身殃，是謂襲常。兌徒外反，曰音  
 天下有始，可以為天下母者，兼上章謂道生萬物也。既知其母，復知其子者，言既知所生之始，則反復知為其子，當不背本也。既知其子，復守其母者，言既知當不背本，則反復守母之道也。道即無為守之，即塞兌閉門是也。兌，口言之所出也。塞之，慎言不忘出也。門，人之所出入也。閉之，不求於外也。謹慎言行，不毀所受之性，所以復守其母也。若然



者沒身不危殆。終身不勤勞而永逸也。若乃開其兌縱之欲，濟其事而求利不休，則終身不可救也。見小曰明者，所見小而能足，莫求於外，則其所見明也。守柔曰強者，所守柔而不與物爭，則能強也。光明之所發也，用猶和也。光而不耀，復歸其本，則無遺身禍殃也。是襲藏道而不變故曰是謂襲常。常天常也。此章言人當知其所生之本，慎謹言行，不損所受之性也。見小守柔是其術也。莊子太宗師山木等篇多言此意。

使我介然章第五十三 凡五十二字

使我介然有知行於大道，唯施是畏。大道甚夷而民好徑，朝甚除，田甚蕪，倉甚虛，服文彩，帶利劍，厭飲食，貨財有餘，是謂盜夸，非道也哉。

音無厭於鹽反

介音戛好呼報反徑經定反朝直遙反蕪

介然猶倏然有知，謂有知用我者也。言使我倏然有知而用者，得執政而行大道於國家，唯有所施為是畏爾。大道無為而甚平夷，然世人好邪徑，行險徼幸，其利益國家者所為，宮室朝廷雖除潔而甚美，其田野甚荒蕪，倉廩甚空虛，田蕪則民食乏，倉廩虛則國用匱，而服文彩之衣，帶銳利之劍，厭



膏粱之食貨財有餘而奢靡。是與盜賊攘奪他人之貨而夸其能同。非道之甚也哉。深歎之也。其本由尚賢智而務施為起。故畏我亦有之。唯無為可以治國家也。此章老子感激當時之言也。但服文彩下三句韻不協可疑。

善建者不拔章第五十四 凡九十二字

善建者不拔。善抱者不脫。子孫以祭祀不輟。脩之於身。其德乃真。脩之於家。其德有餘。脩之於鄉。其德乃長。脩之於邦。其德乃豐。脩之於天下。其德乃普。故以身觀身。以家觀家。以鄉觀鄉。以國觀國。以天下觀天

下吾何以知天下之然哉。以此。拔皮八反 輟張劣反

善建立者不拔。擢。譬如樹木植地而固。根善抱持者不脫去。譬如山崖臨澗而包巖。上章所謂塞兌閉門。見小守柔。是建抱其身之善者也。傳之子孫而能體此道。則爵祿不失。祭祀不輟也。輟。止不輟。不絕也。脩之身。則其德真。而非假。脩之家。則其德有餘。而可施及於他。脩之鄉。則彌長。脩之邦。則豐饒。脩之天下。則普洽。所脩大。則其德從而大矣。皆觀其所脩。而可知也。吾所以知脩之天下。其德普洽而洽者。以此善建不拔。善抱不脫也。此章設譬。



喻而說無為之道脩之身可以及鄉國天下也其  
 曰真曰有餘曰長豐普協韻爾非有深意也庚桑  
 子曰全汝形抱汝生無使汝思慮營營亦謂此意  
 含德之厚章第五十五 凡八十四字

含德之厚者比之於赤子也蜂蠆虺蛇不螫猛獸不  
 據攫鳥不搏骨弱筋柔而握固未知牝牡之合而峻  
 作精之至也終日號而不嗄和之至也知和曰常知  
 常曰明益生曰祥心使氣則強物壯則老謂之不道  
 不道早已此必履反蜂芳逢反蠆救賣反虺虛鬼反  
 蛇食奢反螫矢亦反攫俱縛反搏音博筋  
 居勤反握於學反牝頻忍反牡在反  
 反峻字垂反號戶毛反嗄於介反

含德猶玄德藏而不見也其厚者同赤子純一專  
 固無求無欲而不動心莫犯衆物故物亦不害之  
 毒蟲以尾端肆毒曰螫虎豹熊羆以爪按拏曰據  
 鷗鷖鷲鷹以羽擊觸曰搏莊子曰至德者火弗能  
 熱水弗能溺寒暑弗能害禽獸弗能賊非謂其薄  
 之也言察乎安危寧於禍福謹於去就莫之能害  
 也蓋述此肯骨弱筋柔而純一故握之固也未知  
 雌雄之交而峻作精氣充盈之至也峻說文云赤  
 子陰也作起也終日雖號喜怒不動心而和故聲  
 不破也嗄聲破也莊子引之作嗑不嗄今從古本



知和而守即襲常也。知襲常而行者自知之明也。生不可益強求益之者自招禍也。祥猶妖吉凶之先見也。心宜靜虛使氣而動則強強梁者不得其死。物壯盛則老衰必然之勢也。不知常而益生是妖也。非脩道者之所為。故謂之不道。苟知不道則宜速止而不為也。此章言脩道在內不在外。宜畜藏而不見以全其性。若求益之則反損之也。莊子庚桑楚篇專言此意。

知者不言章第五十六

凡六十九字

知者不言言者不知。塞其兌閉其門。挫其銳解其紛。

和其光同其塵是謂玄同。故不可得而親亦不可得而踈。不可得而利亦不可得而害。不可得而貴亦不可得而賤。故為天下貴。挫子卧反 銳悅歲反 聖人行不言之教。知者之所不言也。可以言論者物之麤也。欲以言盡者不知道也。塞其兌以下六句。解見前章。塞口絕交頓銳止爭。晦德混俗是謂玄德。而混同庸俗也。若然者人不可得而親。踈利害貴賤之則無物可以尚之。所以為天下貴也。此章言道不可以言語思慮求。唯脩諸身而得之。古昔得道之人如是也。莊子知北游篇詳述此旨。



以政治國章第五十七

凡八十八字

以政治國以奇用兵以無事取天下吾何以知其然哉以此天下多忌諱而民彌貧民多利器國家滋昏民多智慧衆事滋起法令滋章盜賊多有故聖人云我無爲而民自化我好靜而民自正我無事而民自富我無欲而民自樸好呼報反政者正也以正正不正之謂也奇譎也孫子云兵者詭道也字異意同乃能而示不能用而示不用之謂也言以政率下而有不從者必臨之以威則不得不以奇用兵也是尚賢智而務施爲則民生

覬覦或崛強不從遂至用兵也唯以無爲化民孩之則百姓皆注其耳目而心服上章云故取天下常以無事及其有事不足以取天下與此章相發吾知其然者以此以政治國則至以奇用兵也天下多所忌諱則民趨詐僞捨本務末而日彌貧也利器利國之器民多才智權謀爭起則或眩惑之國家欲利滋昏所謂庶人議也民多智慧爭奇競巧狡黠求利所以衆事滋起也上非寡欲則雖章明法令以禁之盜賊彌多上章云不貴難得之貨使民不爲盜仲尼對季氏曰苟子之不欲雖賞之



不竊。與此章相表裏。故聖人云我無為而民自化。所謂無為而無不為也。我好清靜而民止機心。則無不正。我無事而民務本。儉素則富。我無欲而民亦復樸言。崇本而末自息也。此章言有為則無所為。故尚不治之治也。次章詳申其旨。莊子在宥篇推明此章之意。

其政悶悶章第五十八

凡七十字

其政悶悶。其民淳淳。其政察察。其民缺缺。禍兮福之所倚。福兮禍之所伏。孰知其極。其無正。正復為奇。善復為妖。人之迷。其日固久。是以聖人方而不割。廉而不

不削。直而不肆。光而不耀。

悶莫頓反。劇居衛反。耀以照反。

悶悶。滿也。謂無為之治。渾沌若昏也。淳淳。質樸也。察察。明也。謂其政刑明察。糾正姦邪也。缺缺。不足也。此兼上章聖人云四句而言。以無為為化。下渾濁其心。若昏悶悶。則民亦淳淳質樸也。其政刑明察。務正邪曲。則櫻民心。缺缺。惟日不足。莊子所謂喜怒相疑。愚知相欺。善否相非。誕信相譏。而天下衰矣。是也。倚。依也。伏。匿也。極。止也。言禍福無常。相倚伏。如糾纏。其所極。止不可得而知也。蓋有遭禍。畏懼。脩身而致福者。有遇福。驕奢。邪僻而招禍者。淮



南子所載塞上之人能得此旨矣其無正者謂無以政正之也以正正之其正復為奇乃謂上章以奇用兵也以善治之其善復為妖是禍福相倚伏也而世人知正可以正不正善可以治國而莫知其正善復為奇妖其迷固久矣是以聖人方而不割者謂示大方而不割裁所謂大制不割也廉而不剝者剝傷也謂己廉而不剝傷於物也直而不肆者肆遂也謂己直而不遂直物所謂大直若屈也光而不耀者謂晦其光而不照耀於物所謂和其光也此章以禍福倚伏申明聖人欲治故不治之尚無為之化之意也方而不割以下四句即其所行也。

治人事天章第五十九 凡六十四字

治人事天莫如嗇夫唯嗇是謂早服早服謂之重積德重積德則無不克無不克則莫知其極莫知其極可以有國有國之母可以長久是謂深根固蒂長生久視之道嗇生力反夫音符重直容反

治人者謂修身也事天者謂全所受之性也王弼曰莫如猶莫過也明謂嗇愛也謂愛嗇己身不以有涯隨無涯也前章所謂愛以身為天下者嗇之



至也。塞兌閉門，挫銳解紛，和光同塵，是嗇身之目也。言治人事天，莫過愛嗇其身也。早服者，謂早歸服於道也。言夫惟愛嗇其身，是歸服於道之早也。早歸服於道者，德之所以重積也。克能也，重積德於身，則於事為無不克。於事為無不克，則莫知其所極止。若然者，可以有國。即前章所謂修之於身，其德乃真，修之於邦，其德乃豐，是也有國之母者，即與前章云為天下母同，謂道也。言其所修於身之德，重積而成，所為有國之母之道也。如是者，可以得長久也。是謂深根固蒂者，即前章善建者不

拔。善抱者不脫也。蒂，說文云瓜當也。言嗇是治人事天之本。修之，可以有國。則與樹木深其根而不拔，果菰固其蒂而不脫同。乃長生久視之道也。此章言嗇身為行道之本也。莊子養生主篇推明此章之意。

治大國章第六十 凡四十八字

治大國若烹小鮮。以道莅天下，其鬼不神，非其鬼不神，其神不傷人，非其神不傷人。聖人亦不傷人，夫兩不相傷，故德交歸焉。亨，音庚反。鮮，音仙。莅，音利。又音類。夫，音符。亨，烹也。小鮮，肉脆。數攪之則敗，舍而待其熟，爾治



大國亦與此同。數更法令則利害變易，民心不安。乃欲治之而反亂之，唯任其自然而待化，則不治而治。故曰：治大國若烹小鮮也。道無為也，莅臨也。其鬼不神者，謂妖誕之說不行，乃聽於人而莫聽於神也。其神不傷人者，謂不崇也。言以道莅天下而民寡欲不徼幸，則莫以非禮黷神，乃神亦不以災禍傷人也。故曰：非其鬼不神，其神不傷人也。韓非云：治世之民不與鬼神相害也。疾人之謂鬼傷人，逐除之之謂人傷鬼也。民犯法令之謂民傷上，上刑戮民之謂上傷民。明謂蓋無為化民，不以政

刑務糾察皆孩之。故曰：非其神不傷人，聖人亦不傷人也。言不啻神不傷人，聖人亦不傷人。老子主意在此句也。上下不相害，幽明不相犯。上修為上之道，而下守為下之分。國家和平，各歸其德。故曰：夫兩不相傷，故德交歸焉。此章言治大國者任天地自然之道，而莫撓民心。若烹小鮮，不攪而待其熟焉。則上下不相傷，而得善治也。莊子知北游篇末稱：仲尼曰：聖人處物不傷物，不傷物者，物亦不能傷也。唯無所傷者，為能與人相將迎，乃與此章合。



合大國者下流章第六十一 凡八十五字

大國者下流。天下之交。天下之牝。牝常以靜勝牡。以其靜故為之下。故大國以下小國。則取小國。小國以下大國。則取大國。故或下以取。或下而取。大國不過欲兼畜人。小國不過欲入事人。夫兩者各得其所。欲大者宜為下。牝類忍反以下或下遐嫁反夫音符

下流淵藪衆水所歸。湊也。左傳所謂川澤納汙山藪藏疾。亦此意也。交會也。牝雌也。言大國者人之所畏。故天下交會焉。猶衆水湊淵藪也。雄躁雌靜。以其靜常勝牡。以其靜為之下。牡從之也。故以大

國下小國。則取小國。取者謂撫綏小國也。取大國者。謂為大國所容畜也。夫兩者大小國也。各得其所欲者。以其下之也。小國下大國。世所常有也。大國下小國。希也。以大下小。其效大矣。故曰大者宜為下。此章言交鄰國之道。謙虛下人。則亦可以保國家。是謙下之德也。蓋周德陵夷。諸侯放縱。強暴弱。大虐小。小亦不服。而亾社稷者。間有之。老子以為末世大道不行。唯謙下亦足以救當時之弊。乃亦濟世一術。文義自明。孟子云。惟仁者為能以大事小。故湯事葛。文王事昆夷。是大宜為下也。春秋



稱邪儀。父而貴之。是嘉小下大也。

道者萬物之奧章第六十二 凡八十一字

道者萬物之奧。善人之寶。不善人之所保。美言可以市。尊行可以加。人之不善。何棄之有。故立天子置三公。雖有拱璧以先駟馬。不如進此道也。古之所以貴此道者何也。不曰求以得。有罪以免耶。故為天下

貴。奧鳥報反。行下孟反。先悉薦反。曰音越。

奧內也。尊者居之。故貴也。爾雅云。西南之隅謂之奧。寶者善人寶持之。而全其性也。所保者言善人資不善人而不棄。則不善人亦庇廕之。以保其身。

也。市買也。言吾有美言。必有知之者。是以言買之也。如鄭然。明一言為叔向所知。是也。加尚也。言吾有尊行。則有貴之者。是加人也。人之不善。何棄之有者。前章所謂聖人常善救之。故無棄人。是也。三公。周官云。立太師太保。茲惟三公。言雖立天子之貴。置三公而下之者。以貴道故也。拱璧合拱之璧。至寶也。駟馬四馬也。言拱璧雖貴。先駟馬者禮也。駟馬陳于外。執璧以將命。曰先。即如左氏傳。鄭商人弦高。以乘韋。先牛十二犒秦師。鄭伯賞入陳之功。亨子展。賜之先軺三命之服。先八邑。是也。



進進而脩之也。此道即無為謙虛聖人所行也。求  
 以得。有罪以免者。上章所謂夫兩者各得其所欲  
 是也。以以此道也。此章言道之於萬物。猶室中之  
 奧。善人全性。不善人庇之。吾有美言尊行。可以市  
 加於人。人之不善。何惡而棄之。以天子下三公者  
 是道之貴也。進而脩之。則道為我有德。莫大焉。求  
 而得。有罪而免。是謙下之效也。是乃古之所以貴  
 道也。故天下莫貴焉。

為無為章第六十三 凡七十九字

為無為事無事味無味大小多少報怨以德圖難乎

易為大乎細。天下之難事必作於易。天下之大事必  
 作於細。是以聖人終不為大。故能成其大。夫輕諾寡  
 信。多易者必多難。是以聖人猶難之。故終無難矣。以易

鼓反夫音符多難舊音乃旦反今如字

前章云反者道之動。三句皆反為之也。言欲有為  
 故為無為。欲成事故事無事。欲有味故味無味也。  
 大小多少報怨以德者。與前章善不善皆善之同  
 意。怨亦報之以德。則其餘無不以德者。乃渾其心  
 皆孩之也。如漢文帝貴南越王佗兄弟。賜吳王以  
 几杖。稍近之。圖難乎。易者言不輕忽於易。則不至



於難也。為大乎細者言敬重於細則不至於大也。事預於前而慎始也。難事必作易者輕忽於易故也。大事必作細者不敬重於細故也。聖人終不為大事者能敬重於細故不至大也能成其大者言能敬重其細行積成大德也。旅爨云不矜細行終累大德與此意通。輕諾不慎言者不得踐行所以寡信也。輕易之多所以難事之必多也。聖人猶難之而慎重之故於天下之事無難矣。其圖難乎易者下章詳言之。此章言聖人欲有為故無為。其欲有為不慎于始不能成終故重易慎細其所重慎。

積成大德則無難事。聖人猶尚慎之也。書所謂慎厥初惟厥終終以不困即同此旨。

其安易持章第六十四 凡百二十六字

其安易持其未兆易謀其脆易破其微易散為之乎其未有治之乎其未亂合抱之木生於毫末九層之臺起于累土千里之行始于足下為者敗之執者失之聖人無為故無敗無執故無失民之從事常於幾成而敗之慎終如始則無敗事是以聖人欲不欲不貴難得之化質學不學以復衆人之所過以輔萬物之自然而不敢為。

易以鼓反脆七歲反累劣被反敗必買反幾音祈



自安。不忘危。持之非難。事未兆。見謀之不難。脆說文云。小粟物。破之甚易。事微者。易消散。是皆謂慎小之易也。為之乎。其未有治之乎。其未亂。即兼上文而謂不可不慎始也。周官云。制治于未亂。保邦于未危。與此意同。合抱之木。生於毫末。以下三句。皆謂大作於細也。為者。敗之執者。失之。見二十九章其言以賢智為之。反而敗之。以法度執之。反而失之。即前章正復為奇。善復為妖。是也。聖人無為無執。所以無敗失也。民之常於幾成而敗事者。不慎終故也。旅獒所謂為山九仞。功虧一簣。是也。故曰慎。

終如始。則無敗事也。欲不欲者。第三章不見可欲。使民心不亂。是也。不貴難得之貨。即見不欲於民也。學不學者。非不學之謂。即前章為道日損。是也。世人以不學為過。而為學日益。吾則學不學日損。而反復人之所過也。此章言慎小於始。則易。若至於大。則難。猶毫末之萌。至于合抱。則用斧斤也。積小成大。猶層臺起于累土。遠行始于舉足。而以有為為之。則非為之。而反敗之。以法執之。則非執之。而反失之。唯無為無執。則無可敗者。無可失者也。世人倦于事。怠之常於將成而敗之。慎之如始何。



敗事之有。是以聖人欲不欲。學不學。始終不變法。象天地之道。輔翼萬物之自然。而不敢有為。則不治而治也。

古之善為道章第六十五 凡七十字

古之善為道者。非以明民。將以愚之。民之難治。以其多智也。故以智治國。國之賊也。不以智治國。國之福也。知此兩者。亦楷式。常知楷式。是謂玄德。玄德深矣。遠矣。與物反矣。乃至大順。

明民即多智也。愚之前章使民無知無欲是也。民之難治以其多智也者。前章所謂民多利器。國家

滋昏也。是乃尚賢智而有為故也。故曰故以智治國。國之賊也。言非治之而賊之也。不以智治國。則以無為是國之福也。此兩者。賊與福也。楷式。治國法式。知猶用也。言知此法式而用之者。其德深遠。民難得而知之。故曰是謂玄德也。物事也。與物反矣。言不明民而愚之。不以智而以無為。是反而為之也。此章言古之以道治國者。不以智導民。而以無為。愚之以智。則民生爭心。是害國也。以無為。則無為。而無不為。是治國楷式也。苟知之。而用。則與物反。而至大順自然之道也。莊子馬蹄。筴在宥。



等篇多言此意。秦欲愚民而滅先代，典籍焚書坑儒，不慮以智之賊國，可謂務末而忘本噫。

江海為百谷王章第六十六 凡八十字

江海所以能為百谷王者，以其善下之也。故能為百谷王，是以聖人欲上，民必以言下之；欲先，民必以身後之。是以聖人處上而民不重，處前而民不害。也是以天下樂推而不厭，以其不爭，故天下莫能與之爭。

處呂反樂音洛厭於艷反

江海處卑而下百谷，故眾水歸之，猶諸侯朝王者，故曰百谷王也。即前章所謂下流也。聖人欲上而

下之，欲先而後之，皆反而為之也。恭謙善下而不爭，故民不重之，不害之，樂推而不厭。天下莫有能與之爭者也。厭，斃也。此章言百谷之歸江海者，以其卑也。民之歸聖人者，以其恭儉虛下而不爭也。文義自明。金人銘云：君子知天下之不可上也，故下之；知眾人之不可先也，故後之。又云：江海雖左，長於百川，以其卑也。天道無親，而能下人，即與此章同意。

天下皆為我章第六十七 凡百三字

天下皆為我，道大似不肖。夫唯大，故似不肖。若肖，久



矣其細也夫。我有三寶持而寶之一曰慈。二曰儉。三曰不敢。為天下先。夫慈故能勇。儉故能廣。不敢為天下先。故能成器長。今舍慈且勇。舍儉且廣。舍後且先。是謂入死門。夫慈以戰則勝。以守則固。天將救之以慈衛之。夫音符唯大絕句長竹丈反舍音捨

道無形象。所以為大也。渾其心而莫分。善不善所以似不肖也。若肖猶曰若賢。王弼曰久矣其細。猶曰其細久矣。言若非不肖而賢則不得為大而久矣。其細微也。夫其似不肖所以為大也。子曰惟仁者能好人。能惡人。老子則善不善皆孩之。猶父母

於子。故曰慈不曰仁也。慈故能勇。即仁者必有勇也。儉而不費。則國用不匱。故其所施惠廣也。不敢為天下先者。言克讓不爭。輔翼萬物之自然而不敢有為。則物各遂其性而成其器。是為物之長也。且猶將也。今舍慈且勇。以下三句皆與人爭而為之。乃速禍招害也。故曰是謂入死門也。慈惠下之所服。眾人盡力。所以戰勝守固也。仁者天之所祐。助乃以慈之故。自天護衛之也。此章言以道治國所寶者三而已。然為天所救而能衛之也。

善為士章第六十八 凡四十四字



善為士者不武。善戰者不怒。善勝敵者不與。善用兵者為之下。是謂不爭之德。是謂用人之力。是謂配天古之極也。

不武謂不尚武以爭陵人也。不怒謂善謀勝敗不狂喜怒也不與猶不爭言慮勝而後進不與敵爭強也。為之下謂善下人也不爭之德言不爭則敵亦不能爭若爭亦不得勝也。用人之力言善下之則眾為吾用其力不可量也。配天即下章所謂天之道不爭而善勝也。極至也。此章言謙下不爭之德勉而為之則配天之道是古之善為士者所以

極至于斯也。辭義自明。

用兵有言章第六十九 凡五十六字

用兵有言曰。吾不敢為主而為客。不敢進寸而退尺。是謂行無行。攘無臂。執無兵。仍無敵。禍莫大於無敵。無敵幾亡吾寶。故抗兵相若則哀者勝也。

反仍一作仍幾音祈

主謂舉兵者也。客謂不得已而應之也。不進寸而退尺謂莫進而退不爭而勝也。下四句形容其勝之易。譬如行無行列之陣。攘無臂之人。執無兵之士。仍無敵之壘。攘除也。仍就也是用兵者之言也。



老子難之。以為用兵。至于無敵。禍莫大焉。吾不得已。而用之。非強欲無敵。而戰則雖用兵之善。至于如此。大背吾寶慈之意。故曰禍莫大於無敵。無敵。幾於吾寶也。抗當也。若齊。謂無優劣也。哀者。所謂不樂殺人者也。此章兼上章而言。慈而不爭。則民自服。從何用兵之為。乃用兵之善。雖曰不爭而勝。其窮武。以至于無敵。幾失吾慈而不爭之寶。哀者。勝。不好戰。故也。深排用兵之言。亦前章佳兵者。不祥之器之意。

吾言甚易知章第七十 凡四十九字

吾言甚易知。甚易行。而人莫之能知。莫之能行。言有宗。事有君。夫唯無知。是以不我知。知我者希。則我者貴。是以聖人被褐懷玉。易以敦反。夫音符。被音備。褐戶葛反。

前章云大道甚夷。所以易知。易行也。世俗尚賢。智而好聰明。所以莫之能知。莫之能行也。宗族之所總也。君主也。莊子云。帝王之德。以天地為宗。以道德為主。言有宗。宗。天地不言。而化育。即不言之教也。事有君。主。道德無為。而無不為。即無為之益也。唯無知。此道者。是以不知我。而用也。希。少也。言。知我者少。則我道之所以貴也。褐者。賤人之服。玉者。



至寶賤人而懷至寶是乃衆人之所難知也此章言吾所言之道固非難知難行者而世人無知之行之者則道隱而不見譬如被褐懷玉則無知之者益知吾道之貴也蓋嘆道不行于世之言

知不知章第七十一 凡三十字

知不知尚矣不知知病矣夫唯病病是以不病聖人不病以其病病是以不病夫音符

知不知下章所謂自知不自見是也言自知吾分而不見其知于外則雖知猶不知若然者莫可以尚焉尚上也不知知言不能自知吾分而務求有

為是世俗之病也唯能患此病慎而守之則不罹此病聖人不病以其患之也此章言聖人明於自知而不見世俗不能自知而求于外故病此病而不得全其性也下章亦述此旨

民不畏威章第七十二 凡四十五字

民不畏威大威至矣無狎其所居無厭其所生夫唯不厭是以不厭是以聖人自知不自見自愛不自貴故去彼取此狎戶甲反厭於艷反夫音符見賢遍反去卷呂反

威天威也不畏所謂小人不知天命而不畏也大威至矣正如詩云大命近止謂死亡之至也狎慣



忽也。所居猶所止。謂所居之職也。言當慎其職而  
不慣忽也。慎其所居。所以敬天也。厭斁也。所生謂  
所受而生之分也。貧富貴賤。乃所受于天。孰不惡  
貧賤而好富貴者。然固有其分。則不可如之何。苟  
厭斁貧賤而強求富貴。則貪利犯罪。無所不為。遂  
陷死。凶雖則富貴。無所饜足。則光武所謂既得隴  
復望蜀。亦人之情也。無厭。深戒之也。夫唯無厭言  
若自知其分。而無厭。則亦復足也。是以無厭言既  
無厭而足。則無不足。所以安而無厭也。所謂知足  
之足。常足是也。聖人自知不自見。言自知之明。而

無營求于外。所以德昧而不見也。自愛不自貴。言  
愛嗇其身。而不欲先人。能下之。所以不自貴也。去  
彼取此。言除去彼。狎厭之惑。取守此。自知自嗇之  
安也。此章言世人不知天威之可畏。求利為非。終  
蒙天誅。是由狎其所居。厭其所生。起聖人反是自  
知自嗇。以全其性。晦德不自貴也。莊子達生篇首  
述此意。

勇於敢章第七十三

凡六十四字

勇於敢則殺。勇於不敢則活。此兩者或利或害。天之  
所惡。孰知其故。是以聖人猶難之。天之道。不爭而善。



勝不言而善應。不召而自來。緝然而善謀。天網恢恢，  
踈而不失。惡鳥路及難乃且反。緝音闡恢苦回反。

敢。敢為也。勇於敢為。必爭而不讓。所以見殺也。孝  
經云。在醜而爭。則兵是也。子路之賢。而夫子猶稱  
不得其死。然况凡庸乎。勇於不敢。所謂勇退。無所  
爭競。所以不死也。兩者同勇。勇非不美。而其所施  
異。則一死一生。利害懸隔矣。天之所惡。謂爭也。天  
之道不爭。則爭者逆天。所以見惡也。而天道難知。  
故不能畏而害身者多。故曰孰知其故。孰誰也。難  
猶病。畏而敬之。之謂也。天之道不爭而善勝。言天

無所爭。而無勝天者。是乃善勝也。不言而善勝。所  
謂四時行焉。百物生焉。是也不召而自來。所謂日  
月運行。一寒一暑。是也。緝然寬綽貌。善謀。謂化育  
莫愆也。天網。以網譬天也。恢恢大也。言天網雖大  
而甚疏。逆者害。順者利。是無所漏失也。此章言勇  
而爭者。天之所惡。人鮮知之。至以殺身。聖人難之。  
謙讓不爭。不敢有為。遵天之道。天之道以下六句。  
乃謂天道自然。無為而無不為也。莊子天道篇略  
言此意。

民不畏死章第七十四 凡五十九字



民不畏死奈何以死懼之若使民常畏死而為奇者  
吾得而殺之孰敢也常有司殺者殺夫代司殺者殺  
是謂代大匠斲夫代大匠斲者希有不傷其手矣音夫

符斲陟  
角反

民不畏死者貧苦切身救饑求生動輒犯法其轉  
溝壑與罹刑戮死則一耳所以不畏也則雖嚴刑  
不能懼之詩云鮮民之生不如死之久矣不畏死  
之謂也使民常畏死者所謂導之以政齊之以刑  
也王弼曰詭異亂群謂之奇也孰敢言無敢違者  
也常有司殺者殺即兼上章天網謂造化司生殺

也斲削也此章言民患貧不畏死何以威之是聚  
斂暴民其苛政不足論也若以政刑治國而使民  
畏死則刑有罪民亦服從其治非不善而非所謂  
至治是代造化而殺也譬猶拙工代大匠斲不翅  
不能斲削不毀傷其手者少矣亦前章正復為奇  
之意乃以政刑治國為非至善則以不治而治為  
至善見於言外

民之饑章第七十五

凡五十六字

民之饑者以其上食稅之多是以饑民之難治者以  
其上之有為是以難治民之輕死者以其求生之厚



是以輕死。夫唯無以生為者。是賢於貴生。夫立音符  
 食稅之多。聚斂之甚也。聚斂甚則民食之。所以饑也。有為前章所謂以智治國也。以智治國則民亦多智。巧詐爭起。所以難治也。輕死即不畏死也。民苦貧窮。急求今日之生。而不顧明日之死。所謂窮斯濫矣。無以生為者。前章所謂使民無知無欲。而無以求生為急也。貴生謂貴求生也。此章言民窮則輕死。多智則難治。是皆由上之所為。唯無為化之。使民愚而無求生。則賢於貧與多智之貴生。遠矣。乃聚斂之非。有為之害。無為之益。不言而顯。

人之生章第七十六 凡六十一字

人之生也柔弱。其死也堅強。萬物牝木之生也柔脆。其死也枯槁。故堅強者死之徒也。柔弱生之徒也。是以兵強者則不勝。木強則共。故堅強處下。柔弱處

上 脫七歲反 稿苦老反 共居用反 處昌呂反

徒屬也。兵強則不勝。言負強而爭則雖一再勝。終必敗亡。如吳王與晉爭伯。智伯請地是也。共供也。言木強者見伐而供器用也。死者歸復于土。是處下也。生者出于地上。是處上也。此章以死生上下人之易知者。比柔弱與堅強之美惡。以喻柔弱之

翼註本無物二字  
 柔脆一作弱  
 故堅強者今本無故字  
 之徒古本下有也下句同兵強者  
 本下有者共一作折強大然下古  
 本作故堅強處下



王註本作其猶張弓與

王本孰能有餘以奉天下唯有道者是以聖人為而不恃功成而不處其不欲見賢

天之旌也視同仁欲其平均如一無有餘不足之偏故常意在于損有餘而補不足人之道則不然蓋嘆其意常相反也凡他弓附在弱向張則弱向下弱在上附把中則弱之作箭弓頭也

可守堅強之不得全也文義自明

天之道章第七十七 凡八十九字

天之道其猶張弓者與高者抑之下者舉之有餘者損之不足者補之天之道損有餘而補不足人之道則不然損不足以奉有餘孰能損有餘以奉不功足于天下者其唯有道者乎是以聖人為而不恃功成而不處其不欲見賢耶與音餘處昌呂反見賢遍反  
**易**云天道虧盈而益謙是損有餘而補不足也張弓者抑弣之高舉弣之下損有餘補不足使弓力均也弓力均而後可以求中是似天之道也人之

方曰從物此水之柔弱也决堤防之類此其攻堅者也

道謂世人之所道也損不足以益有餘言不足治身而欲有為是乃以己不足奉他有餘也己有餘以奉天下唯有道者能之奉不功即不處功也莊子所謂道之真以治身其緒餘以為國家是也故雖有所為不恃其能雖成事業不處其功不欲其賢見于外也此章言聖人則天道而行治身之餘以濟國家乃避功名藏賢明世人反之莊子讓王篇專言此旨

天下莫柔弱於水而攻堅強者莫之能勝以其無以

天下莫柔弱於水而攻堅強者莫之能勝以其無以



王弼曰用也其謂水也言用水之柔  
弱無眚可以易之也此以易為代也  
呂氏甫曰雖曲折萬變而終不失  
其所以為水是其無以易之也此以  
易為變易也  
李亨甫曰易為輕易曰柔弱者  
不期勝而自勝也故又戒之曰其無  
以輕易柔弱者為也  
大戴禮勸學篇孔子論水曰受惡不讓  
似負受惡即此章之受垢也

左宣十五年伯宗曰澤納汗山  
藏藏疾瑾瑜匿瑕國君含垢  
天道也

和大怨一下有者必有餘怨一  
無必故有德司契一無故  
不責於人不肯取于民之謂也  
曲禮上獻粟者執右契註契券  
也要也執契也符也皆所以合  
以表信故契符二字皆為合  
之代字也

易之也弱之勝強柔之勝剛天下莫不知而莫之能  
行是以聖人云受國之垢是謂社稷主受國之不祥  
是謂天下王正言若反也垢古與衆人之所見反故曰反  
水為柔弱之至而其能穿石敗隄防天下莫過之  
所以然者以能守柔弱之性而莫變易之也天下  
之人知弱勝強柔勝剛而不得行之者皆以競智  
好勝不能處卑下而守之也垢汗滓也受國之垢  
言處下流而受汗垢也左傳所謂國君含垢與此  
同意社稷主謂國君祥善也受國之不善言能受  
容不善而不棄也是謂天下王言其所受容大者

其功德亦隨而大也正言若反言反而言之是乃  
道之正也此章言水不易至柔而能勝堅強聖人  
亦處卑守柔而能成其德也亦前章天下之至柔  
馳騁天下之至堅之意

和大怨章第七十九 凡四十字

和大怨必有餘怨安可以為善是以聖人執左契而  
不責於人有德司契無德司徹天道無親常與善人

怨紆萬反  
契苦計反

剝取也

謂私親也

聖人有德與  
而不取之入也

怨之大雖強和之而親睦中心必有餘怨未如始  
無怨者安可以怨為善乎蓋欲言聖人施惠敷



德不求其報之意故先發此言也鄭玄注周禮云書契謂出予受入之凡要簿書之最獄訟之要辭皆曰契乃左契財主之所執右契受者之所執聖人執左契而不責於人言既執左契之徵可以責人而不責之恐怨歸於我乃譬喻施惠於人而不求其報也蓋負債不償者責之已甚則不但不得償財却生怨恨雖固非理亦窮迫之情爾此馮驩所以為孟嘗君燒券也司主也唯主惠而不求償故曰有德司契也徹如徹彼桑土之徹主徹取而責債故曰無德司徹也與猶祐言天祐善人也此

章言和怨不如不生怨之善有德者主惠無德者主財其意懸隔天道與善所謂積善之家必餘慶也乃勸善戒貪語意甚切

小國寡民章第八十 凡八十二字

小國寡民使有什伯人之器而不用使民重死而不遠徙雖有舟輿無所乘之雖有甲兵無所陳之使民復結繩而用之至治之極民各甘其食美其服安其居樂其俗鄰國相望雞犬之聲相聞民至老死不相往來

輿音餘復音服又扶又反治直吏反樂音洛

什伯謂千也正如詩云十千維耦言國小民寡則

使民

什伯之器作什伯人之器

而不用一有也

使民重死而不遠徙樂本

無此句

本民作人

甘其食古本上有至治之極民

各六字

安其居一作俗樂其俗作

樂其業

犬又作狗 聲作音

使民至一無使而不相往來

一無而相下有與



使有千人之器械無所用之乃譬喻民懷其居而不徙則猶僻地之民生其土而莫知於外則心無所羨也重死愛身也不遠徙樂其土而不離也是皆德化之所致也若然者舟車甲兵無所乘陳也復結繩使復上古結繩之世也雞犬相聞鄰界邇也不相往來不交接也言各自足其分而不營求于外所謂無知無欲也此章言以無為化下使民愚而無知無欲安其鄉俗足其衣食無求於外則上古赫胥氏神農氏之世可復也蓋老子慨周德陵遲人口仁義身禮樂而無其實民亦不服其政

善者不辯辯者不善古本作善言不辯辯言不善不積不作無天之道一無之字

上下交趨利而不可濟乃欲以不治治之故不率由舊章務以時俗易知易曉之言反覆申詳其誼者數十章至於此章而說能行此道則其治當如此也其寓意甚深矣莊子胠篋篇述此意

信言不美章第八十一 凡五十七字

信言不美美言不信善言不辯辯言不善知者不博博者不知聖人不積既以為人已愈有既以與人已愈多天之道利而不害聖人之道為而不爭以為于偽反己

甚倚反

信言主踐行不事華美美言反是善言主善不強



辯辯言反是知者貴精所以不博也博者所知麤  
而不精猶不知也聖人不積謂虛靜恬淡寂寞無  
為也莊子天道篇云聖道運而無所積故海內服  
述此旨也為人與人謂治國濟民也天覆育萬物  
而利達之則無所害聖人之道無為而無不為則  
無所爭此章言信則不美言善則不辯言知精則  
不博顧其所主如何耳聖人恬淡虛靜無所蘊積  
乃以為人而已有餘與人而已不之乃則天道自  
然無為而無不為則無與物爭老子所說自始至  
終言不事美而主信不強辯而主善知必精而不

欲麤要欲以不治治國如天道利而不害也故於  
此章述之也

凡正文五千三百八十七字

老子特解終



老子傳  
 卷之三  
 五十五  
 五十六  
 五十七  
 五十八  
 五十九  
 六十  
 六十一  
 六十二  
 六十三  
 六十四  
 六十五  
 六十六  
 六十七  
 六十八  
 六十九  
 七十  
 七十一  
 七十二  
 七十三  
 七十四  
 七十五  
 七十六  
 七十七  
 七十八  
 七十九  
 八十  
 八十一  
 八十二  
 八十三  
 八十四  
 八十五  
 八十六  
 八十七  
 八十八  
 八十九  
 九十  
 九十一  
 九十二  
 九十三  
 九十四  
 九十五  
 九十六  
 九十七  
 九十八  
 九十九  
 一百

老子特解跋

先師老年注老子未半疾而沒病中謂小子  
 輩曰昔者老子著五千言人不知其所終余  
 亦注之欲以絕筆而罹疾不得遂其志然大  
 意略具序及解若有繼余志則何不可為小  
 子懋哉爾來三十餘年先輩即世同學寥  
 先師特得之說將不傳於世而廢明不堪歎  
 惜焉竊忘固陋續注五十章么磨骨薄劣無論



老子牛角距  
得老子旨與否亦未知當先師意不乃  
狗尾續貂之譏固所不辭也若得先師之  
說行於世則蒼蠅附驥亦竊所願也往昔  
曹參學蓋公以貴清靜齊國安集後代  
蕭相國日夜飲酒不事其事民歌畫一  
文帝恭儉務以德化下海內殷富太倉之  
粟陳、相因斷獄數百幾致刑措則雖非  
禮樂之治三代以下於斯為盛乃至景帝


有七國之難武帝雄才大畧征夷狄好神  
僊奢侈過度而天下巍然不動所謂善  
建者不拔善抱者不脫足以徵矣先師之  
說蓋有所據也老子言兵者數章人或疑  
焉夫治國家者兵不可一日闕唯顧其所  
用如何耳是亦可以見其意在濟世也晉  
人盛尚老子而玄理掩其貪鄙清言飾其  
放縱乃如王夷甫名望蓋世一敗石勒真



情頓露路可以醜笑矣。晉人尚老子口玄虛而無其實，猶周末人口仁義而無其行，所以土崩也。先師所解能熟讀之，則可以脩身而施邦家，不帝恬淡虛無，獨善其身是明之所以不得默止而為之續注也。乃欲刻于家以傳同好書肆請之，明老厭煩遂聽其言覽者察之。


天明壬寅八月幾望

金峰宮田明謹書







天子御覽



金剛宮田印書



天明三癸卯春三月

江都書肆

松本善兵衛

須原屋茂兵衛

同 平助

小林新兵衛



